



Il chastè da Prangins durant la renovaziun il 1995.

FOTOS MUSEUM NAZIUNAL SVIZZER



Giachetta da dunnas dal 1780 che raquinta l'istorgia da la produziun da textilas.

In cudesch rumantsch sur da Prangins

Il chastè da Prangins è la filiala dal Musuem naziunal en la Romandia

DA CLAUDIA CADRUVI / ANR

■ **Il chastè da Prangins tranter Vad e Geneva tutga tar il Musuem naziunal svizzer. Igl è la filiala per la Romandia ch'è vegnida averta il 1998. Il cudesch rumantsch «Scuvrir l'istorgia» raquinta da Prangins.** Dapi l'avertura mussa il chastè objects che dattan perditga dal 1750 fin il 1920. Il chastè sez raquinta dentant era gia bler da quest'epoca, en la quala la Svizra è sa furmada e sa midada essenzialmain. La ritscha da possessurs dal chastè è exemplarica per il svilup dals ultims tschientaners. Ils possessurs «èn stads colliads stretgmain cun ils eveniments naziunals ed internaziunals. Il chastè è perquai daventà ina perditga singulara dals svilupps ch'han manà or dal Ancien Régime fin en il temp preschent».

Era Voltaire è stà sin visita

L'onn 1723 acquista il banchier Louis Guiguer il signuradi ch'è pulit en decadenza. Il banchier, oriund da Son Gagl, viva a Paris e fa là blers daners. El n'è atgnamain gnanc interessà da viver a Prangins. Igl è la vista d'in titel da noblezza ch'intimescha el d'acquistar il bain.

Guiguer appartegna a Paris er al circol enturn il renumà John Law, il creatur dal sistem da credit che sa basa sin daner en palpieri. Malgrà che Guiguer na viva betg a Prangins, cumenza el tuttna a laschar construir in vast chastè sin il bain.

Il nevs da Guiguer surpiglia pli tard



Chapellina d'enturn 1916.

il signuradi. Lez metta a disposiziun il chastè a Voltaire che resta là per in mez onn. Durant questa dimora decida Voltaire – disfamà en l'entira Europa – da sa chasar sper Geneva.

In diari raquinta dal mintgadi

Il 1770 va il signuradi vi en possess da Louis-François Guiguer. Dal 1771 fin il 1786 scriva lez cun sia dunna Matilda in diari. Quindesch onns, praticamain senza interrupziun, vegn la vita en il chastè documentada. Cun bler umor ed affecziun registreschan Louis-François e Matilda ils gronds e pitschens eveniments dal mintgadi. «Tgi che sa profunda en il diari obtegna in vista en il spiert da quest'epoca avant la revoluziun: En lur opiniuns, ponderaziuns e tendenzas, en la filosofia d'ina

societad che sa chatta sin via en il declin.»

Conspiraziuns da Joseph Bonaparte

Il 1814 vegn il signuradi vendi a Joseph Bonaparte, il frar vegl da Napoleon. Durant che Napoleon è bandischà sin l'insla Elba, vegnan filadas intrigas per far renascher la pussanza da Napoleon. In dals centers da conspiraziun è Prangins.

Strusch in onn resta Joseph Bonaparte a Prangins ch'el sto gia fugir per mitschar da l'arrestaziun.


Il 1873 daventa il chastè ina scola. Radund 2000 mattatschs e giuvens umens passentan là durant tschuncant'onns il temp d'instrucziun en roms sco economia, commerzi, linguas, ma era dissegn, musica, sport, teater e schizunt fotografar.

Ina ritga ertavla americana


Il 1929 arta Katherine McCormick il signuradi. L'ertavla bainstanta passenta il temp da stad sin il bain. Ella batta per il dretg da vuschar da las dunnas e per la controlla da naschientschas. A ses sustegn èsi d'engraziar impurtants progress concernent la cuntracepziun.

Il 1974 cumpran il chantun Vad e Geneva il chastè. In onn pli tard vegn l'object surdà a la confederaziun a basa d'ina cunvegna ch'oblighescha da duvrar il chastè sco sedia da la Romandia per il Musuem naziunal svizzer.

«Scuvrir l'istorgia». Ediziun dal Musuem naziunal svizzer. Translatà dad Ignaz Cathomen. ISBN 3-908025-85-0.



Cuschina da poppas, enturn 1840.



Quest chanun da chargiar davant ha servì per instruir ils giuvens artigliarists. L'artigliaria è stada l'emprima truppa suttamessa il 1815 a la confederaziun.



La Helvetia sco decoraziun da maisa – in regal per il cumissari general svizzer a l'exposiziun mundiala il 1873 a Vienna.